

15. oktober 2007

UKA 2007/47

UKA 2007/48

Imermik pilersuineq pillugu Inatsisartut peqqussutissaattut siunnersuut

aamma

Nukimmik pilersuineq pillugu Inatsisartut peqqussutaata allannguutaa pillugu

Inatsisartut peqqussutissaattut siunnersuut.

(attavilersinnermut akiliisitsinnermut tunngavik)

pillugit

Inatsisartut Inuussutissarsiornermut Ataatsimiititaliaata

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq.

Inatsisartut Inuussutissarsiornermut Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Ruth Heilmann, Siumut (siulittaasoq)
Inatsisartunut ilaasortaq Emilie Olsen, Atassut (siulitaasup tullia)
Inatsisartunut ilaasortaq Vittus Mikaelson, Siumut
Inatsisartunut ilaasortaq Esmar Bergstrøm, Inuit Ataqtigiit
Inatsisartunut ilaasortaq Jens B. Frederiksen, Demokraatit

UKA 2007-imi siunnersuutininik siullermeerineq tunngavigalugu peqqussutissatut siunnersuutit, taakkulu nassuiaatitaatt Inatsisartut Inuussutissarsiornermut Ataatsimiititaliaata misissuataarpai. Imermik pilersuineq pillugu peqqussummut (UKA 2007/47) allannguutissatut siunnersuummik ilusiliinikkut aqqiinernik annikinnerusumik imalimmik siunnersuutip aappassaaneerneqarneranut Naalackersuisut saqqummiussilersaartut ataatsimiititaliap maluginiarpaa. Allannguutissatut siunnersuut taanna apeqquataatillugu ataatsimiititaliaq isumaliutissiissummini matumani pineqartumi isummerpoq.

Tusarniaaneq.

Siunnersuutit piffissami 2. maj – 5. juni 2007-imi tusarniaassutigineqarput. Tusarniaanermut akissutit nuutinnerat kiisalu tuarniaaneq pillugu akissuteqaatinut

allakkiat Inuussutissarsiornermut Pisorta qarfirmmit suliarineqartut Inuussutissarsiornermut Ataatsimiititaliap tiguai. Piffissamut tusarniaaffiusumut, tusarniarfigisassanik toqqaanermut tusarniaanermilluunniit akissutinut tiguneqartunut Ataatsimiititaliaq oqaaseqaatissaqanngilaq.

Siunnersuutit Inatsisartunit siullermeerneqarnera.

Siunnersuutit taakku marluk Inatsisartuni siullermeerneqarmata Inatsisartuni partiinit tamanit tikilluaqquneqarput, Kattusseqatigiilli Partiiat nukimmik pilersuineq pillugu peqqussummut allannguutissatut siunnersuummut (UKA 2007/48) akuersaanngilaq. Siullermeerinermi arlalinnik apeqquteqartoqarpoq, kiisalu Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisumut itisiliissutaasunik apeqquteqarniarluni Inuussutissarsiornermullu Ataatsimiititaliaq ulloq 1. oktober 2007-imi aalajangerpoq. Ataatsimiititaliap apeqqutai Naalakkersuisunullu ilaasortap akissuteqaataa 10. oktober 2007-imeersoq isumaliutissiissummut matumunnga **ilanngussaq 1-itut 2-tullu** ilanngunneqarput.

Siunnersuutit imarisaat.

Nunami maani imermik pilersuinermut tunngasut, tassunga ilanngullugit pilersuisussaataaneq, pilersuinerup isumannaatsuunissaa, imermik pilersuisut namminersortut il.il. kiisalu imermik pilersuivinnik pilersitsinermit ingerlatsiner mullu aningaasartuutit UKA 2007/47-mi nutaamik maleruagassiorneqarput. Aqutsivimmi nunap innuttaanut attaveqarnermullu qitiusumik pingaarutilimmi malittarisassat peqqusutikkut ataatsimoortinneqarput nutarterneqarlutillu. Tamanna Inatsisartut Inuussutissarsiornermut Ataatsimiititaliaannit tikilluaqquneqarpoq.

Suliffeqarfii piginnaasatigut annertusisitsinermikkut il.il. Nukissiorfiit sanaartornernut nutaanik aningaasartuuteqartikkunikkut attaviligaanermut akileeqataassutinik akileeqquneqarsinnaanerannik UKA 2007/48 inatsisitigut tunngavissaqalersitsivoq. Aalajangersagaq taamaattoq aamma UKA2007/47-mi ilaatinneqarpoq.

Inuussutissarsiornermut Ataatsimiititaliap isumaliutai.

Innaallagissamut imermullu tunngasuni attaviligaanermut akileeqataassutip atuutsinneqalernera Inatsisartut Inuussutissarsiornermut Ataatsimiititaliaata matuma kinguliani oqaaseqarfigissavaa, tamatumanilu isumaliutissiissummut matumunnga ilanngussat innersuussutigissallugit.

Attaviligaanermut akileeqataassummut nutaamut atatillugu siunnersuutit inuussutissarsiornermik ingerlataqartunut aningaasalersuinnikkut qanoq annertutigisumik nammakkiissanersut annertuumik nalornissutigineqartoq ataatsimiititaliap maluginiarpaa. Inatsisissatut peqqusutissatullu siunnersuutit suliarineqarnerani inuussutissarsiornermik ingerlataqartunut aningaasaqarnikkut allaffissornikkullu kingunerisassanik naatsorsorsuinissaminnut tamannalu pillugu inatsimmut nassuiaatini aalajangersimasumik paasissutissiinissaminnut

Naalakkersuisut pisussaatitaapput. Aalajangersimasumik naatsorsuisoqarsinnaangippat misilittakkat, assersuutigalugu sanaartornermi aningaasartuutit ukiut arlallit ingerlanerini suliassaqarfimmi tassani agguaqatigiissillugu atorneqarsimasut tunngavigalugit missingiisoqassaaq.

Qanoq annertutigisumik aningaasartuuteqarnissaq naatsorsuutigineqarnersoq aammalu suliassaqarfimmi ukiuni siuliini suut aningaasartuutaasimanersut pillugit paasissutissanik Inuussutissarsiornermut Ataatsimiititaliaq pissarsisinnaasimangilaq. Inatsisissatut siunnersuutip inuussutissarsiornermik ingerlataqartunut aningaasaqarnikkut kingunerisassaasa maanna pisutut ersernerlutsigisumik paasissutsissiissutigineqartarnerat qaqutigoorluinnartoq Inuussutissarsiornermut Ataatsimiititaliaq isumaqarpoq. Attaviligaanermut akileeqaataassutissap ukiuni aggersuni annertussusissaa pillugu ataatsimiititaliamut ilisimatitsissuteqartaqqullugu Inuussutissarsiornermut, Suliffeqarnermut Inuussutissarsiutinullu Naalakkersuisoq **kaammattorneqarpoq**.

Immikkut akuerineqarnissamik periarfissaqartitsinani naatsorsuinermi periaaseq assigiiaartuussasoq Naalakkersuisut oqaatigigaat Inuussutissarsiornermut Ataatsimiititaliap aamma paasivaa. Aningaasartuutunik naatsorsuinermit periaatsip inaarutaasup illuatungeriit susassaqartut, tassunga ilanngullugu aalisakkanik suliffissuit, peqatigalugit atsaat qaammatini aggersuni aalajangiiffigineqarnissaa pissutigalugu attaviligaanermut akileeqaataassutip naatsorsorneqarnerani aningaasartuutit sorliit ilanngunneqassanersut suli aalajangerneqanngilaq.

Paasissutissiissutigineqartut malillugit attaviligaanermut akileeqaataassutissatut akileeqqusissutip pilersuinermit attaveqaatinut attaviligaanermut aningaasartuutinit tamarmiusunit annikinnerunissaa naatsorsuutigineqarpoq. Innaallagissamik imermillu pilersorneqarnissaminnik kissaateqarnertik attaviligaanermut akileeqaataassummik akiliuteqarfigissanerlugu kiisalu taamaattoqassappat akileeqaataassutip qanoq annertugiginissaanik suliffeqarfiit siumoortumik paasissutissinneqassapput.

Naalakkersuisunit isumaliuutigineqartut maanna tunngavissatut pigineqartut tunngavigalugit Inuussutissarsiornermut Ataatsimiititaliap akuersaarsinnaavai, **kaammattuutigaluguli** siunnersuutip aappassaaneernejarnissaanut attaviligaanermut aningaasartuutit procentiat qanoq annertutigisoq attaviligaanermut akileeqaataassutit akileqqulersaarnerlugu Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisup ersarissumik paasissutissiissutigissagaa. Tassunga atatillugu *aningaasartuutunik naatsorsuinermit* periaasissaq pillugu inuussutissarsiornermik ingerlataqartunik isumaqatiginninniarnissaq Naalakkersuisunut isumagisassanngortinneqartariaqartoq ataatsimiititaliaq isumaqarpoq, *aningaasartuutilli ilaat procenti* qanoq annertutigisoq attaviligaanermut akileeqaataassutit inuussutissarsiornermik ingerlataqartunit akileqquneqassanersoq pillugu apeqqummi Inatsisartut peqataatinneqartariaqarlutik.

Inuussutissarsiornermut Ataatsimiititaliap inassuteqaataa.

Siuliani oqaatigisani tunngavigalugit siunnersuut ilusimisut iluseqartillugu
Inatsisartut aappassaaneerinninnerminni akuersissutigissagaat
Inuussutissarsiornermut Ataatsimiititaliap isumaqatigiittup inassutigaa.

Taama oqaaseqarluni Inatsisartut Aningaasaqarnermut Ataatsimiititaliaata
siunnersuut Inatsisartunut aappassaaniigassanngortippaa.

Ruth Heilmann
Siulittaasoq

Emilie Olsen

Vittus Mikaelen

Esmar Bergstrøm

Jens B. Frederiksen

[Ilanngussaq 1](#)

[Ilanngussaq 2](#)